

■ GLOSSA

La talpa e mes vischin

DA BRUNO BLOGG

Regularmain entschaiva el la damaun a las sis, ditg exact la sonda damaun a las sis rampluna il motor dal segapastget da mes vischin. Jau na chapesch betg ch'ins sto segar il pastget bunamain mintga emna, a partir da la fin avrigl enfin l'entschatta october. Pervia da la midada climatica èsi da quintar ch'il segapastget da mes vischin cumenza a lavurar ils onns proxims a partir dal mais mars enfin il december, bunas perspectives. Mes vischin oriund dal chantun Grischun viva en la Bassa ed el turna regularmain il venderdi saira e cumenza la sonda damaun a segar. Tut legal, ha ditg mes collega giurist. Ins dastgia segar, tenor lescha, a partir da las sis enfin la saira a las diesch. La sonda damaun a la sis durmiss jau anc in zichel, il motor da dus tacts da mes vischin lascha dentant stremblir ils barcuns ed il tuffien dal svapur ... jau hassegel segapastgets.

Entaifer ils onns passads èn las maschinas da segar da mes vischin creschidas en relaziun cun ses volumen dal corp. Dapi la primavaira sesa el sin in tractur e charrescha per ses pastget enturn, cun ina ci-

garetta en bucca. La canera n'è betg vegnida pli pintga. Jau stoss dentant punctuar, uschiglio è el in bun vischin, nus dain gugent ina baterlada ed el ha schizunt offrì da segar mes pastget. El valetescha il segar per passatemp, cumpensaziun per sia lavur da biro. Jau n'hai betg vulì dir na e n'hai betg gughegià da dir da cumenzar a segar pir la damaun a las nov. L'oropax cumprà per stuppar las ureglias ha gidà pauc.

La stad da l'onn passà è rut ora la guerra sin il pastget da mes vischin. Betg pervia da la canera. Ina talpa ha tuttenina chattà per bun da sa chassar en il sutterran dal pastget visavi. Per la vista dal mund da mes vischin ina catastrofa. Il mantun terra lavaga il maletg dad in pastget perfect ed ils cuntels da sia maschina, sco el ha savilà sur la saiv vi. Ses cumbat inscenà vers la talpa è sa sviluppà en plirs acts. Sco emprim è il pur stà sin il plaz ed ha miss pliras traplas. Extendidamain ha il pur explitgà sia tecnica da tschiffar talpas. Nizzegià hai nagut, cuntrari, la talpa ha augmentà il dumber da munts da terratsch. «Tissi na dastgel betg duvrrar, quai na fiss betg ecologic, ozendi nun-

pussaivel.» Il vischin ha chattà ina metoda da terminar la vita da la talpa, ina metoda explizit definda per ecologica e cun ina garanzia da success da 100 procent. Uschia almain steva i scrit sin il prospect ch'el ha tegnì a mai si per il nas. «Eliminader da mieurs» sa numna la maschina, ella ha custà in per milli francs. La maschina cun motor da benzin maina il svapur dal motor en la rusna da las mieurs e garantescha ina mort «sperta e senza dölur».

Quai che funcziuna probabel vers la mieur n'ha betg gè effect tar la talpa. Ella è anc adina là e lavura cun premura. Il drama n'è betg stà terminà. Strusch da crair, la primavaira ha il vischin laschà construir in mir da betun enturn ses pastget, in meter ault, in meter en il funs. Cun in effect surprendent, il dumber da talpas e da munts è creschì vivanant. Il vischin ha capitulà, el ha dacurt vendì sia chasa. Per mia vista dal mund ina catastrofa cumpletta. Mes nov vischin na sega insumma betg ses pastget, el lascha crescher tut, in horribel maletg, jau na sai insumma betg durmir pli, il tun dal motor manca.